



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DLXXVII. ad annum DXC.

Parisiis, 1644

Epistola XCVII. Gregorii Papae I. Ad Romanvm Defensorem. De Istrianis ad
vnitatem ecclesiae reuersis.

urn:nbn:de:hbz:466:1-15221

certe prosperitas , habet finem suum terminum mortis. Hoc vero quod de animarum lucris apprehendisti studium , tenet fixam spei suæ certitudinem , æternæ scilicet vitæ retributionem. Quapropter præmisso paterno salutationis affectu hortamur gloriam vestram , vt pro vnitate sanctæ fidei zelum , quem vobis ipse vnitatis auctor tribuit , studiosius peragatis , & quo usque potueritis , in sinum matris ecclesiæ ab schismatis sui reuocantes errore , adhortatione continua foueat. Hoc etiam peragentes , vt & quos per vos Dominus suo ouili redintegrari concederit , ita defensionis vestræ solatiis protegatis , vt non sit quo hi qui adhuc in errore sunt positi , reuertentes ad salubre consilium valeant applicare. Dum enim vos causas Dei in terra agitis , ipse & hic actus vestros protectionis suæ feliciter ope disponit , & in æterna vobis vita , quam cupitis , pro tanto bono vestro retributio existet.

EPISTOLA XCVII.

GREGORII PAPÆ I.

AD ROMANVM DEFENSOREM.

De Istrianis ad vnitatem ecclesiæ reuersis.

Gregorius Romano defensori.

PRÆSENTIVM portatores huc de Istriae partibus venientes , ad episcopum suum , qui nunc in Siciliae degit partibus , cum nostro se pergere solatio poposcerunt. Quos hinc ordinantes fecimus ambulare. Suscipiens ergo eos experientia tua ordinet , qualiter ad prædictum episcopum suum velocius valeant peruenire , ne , sicut astruunt , schismaticorum illarum partium eos alii ad persuadendum præueniant. Quantum enim indicant , ipse episcopus pro vnitate fidei ad nos habet desiderium veniendi. Concurendum ergo illis est , vt bona quæ cupiunt , Domino adiuuante , valeant perficere. Sed experientia tua aut per se , si in vicino est , aut suis epistolis eundem episcopum adhortetur , vt propitiante Domino ad apostolorum limina properare festinet ; sciturus quod a nobis cum omni suscipietur affectu. Cui expensam itineris , qualiter ad nos perueniat , præbere te volumus. Sin vero onerosum illi est huc venire & Siciliam habitare disponit , atque in vnitate

ecclesiæ apud scripturarum peruersores cum cautela permanere consentit, & hoc nobis tua suggestione indicare non differas, vt qualiter illic consultum habere valeat, expensare auxiliante Domino disponamus. Sed & harum latores quemadmodum ad eumdem episcopum suum veniant, tua concursionis sit atque solatii, vt venientes a nobis nihil minus sentiant.

EPISTOLA XCVIII.

GREGORII PAPÆ I.

AD GALLINICVM EXARCHVM ITALIÆ.

De schismaticis ad ecclesiam redeuntibus.

Gregorius Gallinico exarcho Italæ.

APVD excellentiam vestram tanto nobis quæ petimus velut impetrata iam credimus, quanto & hoc quod petitur ab officio nostro non discrepat, & vos inter curas fluctuationum sacerdotalium æternæ quoque ex hoc cumulus retributionis expectat. Harum siquidem latores de Istriæ ad nos partibus venientes, schismaticorum, inter quos erant positi, vitantes errorem, unitati ecclesiæ subdi salubriter cupierunt. Quorum boni intentionem operis perpendentes, in finum matris ecclesiæ competenti cum exhortatione suscepimus, eosque nostræ desiderantes ecclesiæ militare grate concessimus. Præmisso quapropter excellentiæ vestræ paternæ salutationis affectu, petimus vt eos pro bono desiderii sui, quo ad apostolorum principis petram solidam concurrerunt, ne fluctuantum adhuc erroribus mixti naufragium desperata salutis incurserent, habere dignemini commendatos; quatenus ad propria remeantes, nullis propter hoc bonum quod appetiisse noscuntur peruersorum inquietudinibus perturben- tur, sed magis in omnibus auxilium vestræ tuitionis inueniant, vt ex eorum quiete, aliorum adhuc in schismate positorum corda fleuantur, atque horum per bonum vestri patrocinii prouocati sequaces existant. Ad augmentum namque mercedis vestræ pertinet, si inter curas bellicas, sicut corpus ab exteriori hoste, sic animam ab interni insidiatoris impugnatione protegatis.